

09 FEB 1997

KEKALKAN KESTABILAN POLITIK DAN PERPADUAN

SHAH ALAM, 9 Feb (Bernama) -- Menteri Besar Selangor, Tan Sri Muhammad Haji Muhamad Taib mahukan kestabilan politik yang dicapai melalui perpaduan kaum sehingga ini dikekalkan sepanjang masa untuk mencapai kemajuan yang lebih gemilang.

Meneruskan amalan perpaduan kaum ini amatlah penting supaya suasana politik negara lebih stabil dan kukuh di masa hadapan untuk membawa kemajuan yang akan memanfaatkan rakyat tanpa mengira kaum dan agama, katanya.

"Agama Islam bertoleransi dan tidak tekan agama lain dan amalan inilah memberi kekuatan kepada perpaduan rakyat Malaysia sekian lama dan ini perlu diperlihara dan dijaga sepanjang masa," katanya kepada pemberita pada rumah terbukanya yang diadakan di kediaman rasminya di sini, hari ini.

Beliau berkata kerajaan Barisan Nasional di bawah pimpinan Perdana Menteri, Datuk Seri Dr Mahathir Mohammad melaksanakan dasar-dasarnya demi kepentingan semua kaum.

Rumah terbuka itu dihadiri oleh semua lapisan masyarakat termasuk anggota Exco Kerajaan Negeri dan tokoh-tokoh korporat. Sambil mengucapkan selamat Hari Raya kepada Muhamad dan isterinya, Puan Sri Asbi Rohani Asnan, mereka juga beramah mesra dengan pelawat-pelawat lain

Sementara itu di rumah terbuka Raja Muda Selangor masyarakat berbilang kaum dari semua lapisan juga mengunjunginya untuk mengucapkan selamat Hari Raya kepada baginda. -- BERNAMA

KM PR